

Aruba lo por sali perhudica

Companianan di aviacion ta aumenta tarifa di vuelo

ORANJESTAD(AAN) -- Door cu Aruba no tin un compania di aviacion nacional, otro companianan di aviacion ta subi nan tarifa di vuelo.

Informacion cu redaccion di DIARIO a haya for di fuente bon na altura, ta muestra cu tin diferente compania di aviacion a subi nan tarifa di

vuelo entre otro di Miami pa Aruba. Esaki no ta forma un problema pa e companianan cu a haci esaki sino pa Aruba como destinacion turistico. Esaki ta haci cu e prijs pa bin Aruba ta bira mas caro y tur e cosnan aki tin efecto riba un turista cu ta preparando su presupuesto pa bay cu vaca-

cion.

DIARIO den pasado a yega di adverti cu si laga Air Aruba cera, esaki lo kibra e competencia cu tabata existi y ta duna otro companianan di aviacion man liber pa haci y deshaci cu tarifa di vuelo. Diferente companianan di aviacion ta cera cabez y ta

aumenta e prijs di ticket, sin tin cu preocupa cu tin competencia.

Pa loke ta trata compania di aviacion nacional, mayan ta fin di luna y te ainda no a tin ningun informacion encuanto e comienso di operacion di Aruba International Airways. Manera DIARIO a publica aña pasa, Aruba International

Airways (AIA) su intencionnan ta pa cuminsa haci vuelo na medio Februari cu e avionnan MD-90.

Investigacion cu DIARIO a haci ta muestra cu te ainda Direccion di Aviacion Civil no a haya e manualnan di e avionnan MD-90 pa asina evalua esakinan y na final duna e certificado di operacion AOC.

Ta reina un preocupacion pa cu e desaroyo aki ya cu esaki ta nifica cu AIA lo no por cuminsa opera na medio Februari 2001.

DIARIO a purba drenta den contacto cu e motor tras di AIA esta Oscar Wason pero e no ta localisabel. DIARIO por a compronde cu Oscar Wason ta den exterior actualmente.

Manera ta conoci, AIA a haya aprobacion di gobierno pa bula e rutan di Air Aruba. Esey ta encera cu entre otro AIA lo por bula Miami pa Aruba y virse versa pero door cu companianan ta subi prijs di ticket esaki lo bay perhudica nos pais como destinacion turistico.

Den caso di morto di pacient di Aruba Heart Institute

Keto bay Ministro Posner no a reacciona

ORANJESTAD(AAN) Si man pasa parlamentario señor Booshi Wever a acusa ministro Posner y docter Lacle di ta culpable di morto di un pacient cu a haya tratamento di caterizacion na Aruba Heart Institute.

E caso aki ta uno hopi serio y riba cual tabata tin investigacionnan medico andando pa saca afor si tur esnan cu tabata medicamento envolvi a haci nan trabao manera mester ta y unda posiblemente cos lo por a faya na caminda.

DIARIO a sigui e caso aki di cerca pa basta tempo y a prefera di warda te ora cu e prome raport oficial di investigacion medico a keda cla prome cu informa pueblo riba e caso, pero mientrastanto parlamentario Booshi Wever tambe tabata haciendo su averiguacionnan y despues cu el a haya e copia di raport di investigacion, señor Wever tabata e prome cu a sali pa dilanti y cuestiona loke a pasa.

Como parlamentario sigur bo mester busca pa haya sa kico ta pasando na Aruba cu por afecta pueblo en general y mester remarca cu señor Wever a haci su trabao y despues di analiza e prome raport, el a bay over na publica loke e ta kere como parlamentario mester worde treci na conocimiento di pueblo.

Cu na Aruba politiconan ta bringa mahos cu otro pa motibo di politikeria, pa pueblo esaki no ta nada nobo, pero den e caso aki Booshi Wever como parlamentario a bin cu algo pa dilanti cu sigur mester worde atendi debidamente door di instancianan competente na Aruba y no cu e ta haya e mensahe di su contrincantenan politico cu e mester

busca algo otro di haci; aki ta trata di bida di un ser humano cu a bay perdi!!

Si esnan envolvi kendenan mester duna cuenta y para responsabel pa nan actonan ta kere cu djis manda un comunicado fofu sin pia sin cabez ta suficiente pa sera boca di tur hende, nan ta bay haya nan mes mal ekiboca.

DIARIO ta manda un mensahe bon cla y raspa pa tur esnan envolvi; e caso aki no por worde hala un banda sin mas pasobra nos tey pa sali na

vanguardia di tur hende na Aruba y cual responsabilidad nunca nos a core pe.

Pa basta tempo DIARIO a tene pasenshi pa laga tur esnan envolvi cu e prome investigacion haci nan trabao den tur tranquilidad, pero e momento a yega cu esnan cu mester carga nan responsabilidad mester bay duna cuenta y nan no mester lubida cu e señora cu a muri tabata un colega di nos, kende awe kizas si el a haya un mior tratamiento ainda e por

tabata cu su famia y trahando cu nos na DIARIO.

Ningun compensacion den cualkier forma material no por trece nos colega bek, pero loke nos kier ta husticia y ta pesey ministro Posner mester compronde bon cla cu e mester reacciona y pa laga pueblo y na prome lugar, famianan di nos colega sa ki pasonan ta worde tuma den e caso aki.

DIARIO tambe a haya copia di e prome investigacion y loke tin para den e raport no ta nada di gaba pa esnan envolvi, pero nos ta wardando riba reaccion di ministro Posner y pasenshi ta cabando!

WHO IS YOUR AMIGO!!

